

四庫全書

集部

欽定四庫全書

唐宋八大家文鈔卷十八

明 茅坤 撰

柳州文鈔二

書

與太學諸生喜詣闕留陽城司業書

意氣淋漓

二十六日集賢殿正字柳宗元敬致尺牘太學諸生足

下始朝廷用諫議大夫陽公為司業諸生陶煦醇懿熙
然大洽于茲四祀而已詔書出為道州僕時通籍光範
門就職書府聞之悒然不喜非特為諸生戚戚也乃僕
亦失其師表而莫有所矜式焉既而署吏有傳致詔草
者僕得觀之蓋主上知陽公甚熟嘉美顯寵勤至備厚
乃知欲煩陽公宣風裔土覃布美化于黎獻也遂寬然
少喜如獲慰薦于天子休命然而退自感悼幸生明聖
不諱之代不能布露所蓄論列大體聞於下執事冀少

見採取而還陽公之南也翌日退自書府就車於司馬
門外聞之於抱闌掌管者道諸生愛慕陽公之德教不
忍其去頓首西闕下懇惓至願乞留如故者百數十人
輒用撫手喜甚震忭不寧不意古道復形於今僕嘗讀
李元禮嵇叔夜傳觀其言太學生徒仰闕赴訴者僕謂
訖千百年不可覩聞乃今日聞而覩之誠諸生見賜甚
盛於戲始僕少時嘗有意遊太學受師說以植志持身
焉當時說者咸曰太學生聚為朋曹侮老慢賢有墮窳

敗業而利口食者有崇飾惡言而肆鬭訟者有凌傲長上而誣罵有司者其退然自克特殊於衆人者無幾耳僕聞之惄駭怛悸良痛其遊聖人之門而衆為是喈喈也遂退託鄉間家塾考厲志業過太學之門而不敢跼顧尚何能仰視其學徒者哉今乃奮志厲義出乎千百年之表何聞見之乖刺歟豈說者過也將亦時異人異無嚮時之桀害者耶其無乃陽公之漸漬導訓明效所致乎夫如是服聖人遺教居天子太學可無愧矣於戲

陽公有博厚恢弘之德能容善偽來者不拒曩聞有狂
惑小生依託門下或乃飛文陳愚醜行無賴而論者以
為言謂陽公過於納汙無人師之道是大不然仲尼吾
黨狂狷南郭獻譏曾參徒七十二人致禍負芻孟軻館
齊從者竊屢彼一聖兩賢人繼為大儒然猶不免如之
何其拒人也俞扁之門不拒病夫繩墨之側不拒枉材
師儒之席不拒曲士理固然也且陽公之在於朝四方
聞風仰而尊之貪冒苟進邪薄之夫庶得少沮其志不

遂其惡雖微師尹之位而人實具瞻焉與其宣風一方
覃化一州其功之遠近又可量哉諸生之言非獨為己
也於國體實甚宜願諸生勿得私之想復再上故少佐
筆端耳勗此良志俾為史者有以紀述也努力多賀柳
宗元白

與崔餽州論石鍾乳書

全學李斯逐客書

宗元白前以所致石鍾乳非良聞子敬所餌與此類又

聞子敬時憤悶動作宜以為未得其粹美而為麤礪燥
悍所中懼傷子敬醇懿仍習謬誤故勤勤以云也再獲
書辭辱徵引地理證驗多過數百言以為土之所出乃
良無不可者是將不然夫言土之出者固多良而少不
可不謂其咸無不可也草木之生也依於土然即其類
也而有居山之陰陽或近水或附石其性移焉又况鍾
乳直產於石石之精麤疏密尋尺特異而穴之上下土
之厚薄石之高下不可知則其依而產者固不一性然

由其精密而出者則油然而清炯然而輝其竅滑以夷其肌庶以微食之使人榮華溫柔其氣宣流生胃通腸壽善康寧心平意舒其樂愉愉由其麤疎而下者則奔突結澁乍大乍小色如枯骨或類死灰淹穎不發叢齒積穎重濁頑璞食之使人偃蹇壅鬱泄火生風戰喉瘡肺幽闊不聰心煩喜怒肝舉氣剛不能和平故君子慎焉取其色之美而不必唯土之信以求其至精凡為此也幸子敬餌之近不至於是故可止禦也必若土之出

無不可者則東南之竹箭雖旁岐捺曲皆可以貫犀革
北山之木雖離奇液滿空中立枯者皆可以梁百尺之
觀航千仞之淵冀之北土馬之所生凡其大耳短脰拘
攀踧趺薄蹄而曳者皆可以勝百鈞馳千里雍之塊璞
皆可以備砥礪徐之糞壤皆可以封大社荆之茅皆可
以縮酒九江之元龜皆可以卜泗濱之石皆可以擊考
若是而不大謬者少矣其在人也則魯之晨飲其羊闌
轂而轔輪者皆可以為師儒廬之沽名者皆可以為太

醫西子之里惡而曠者皆可以當侯王山西之胃沒輕
儻脊貪而忍者皆可以鑿凶門制閭外山東之稚駢樸
鄙力農桑啖棗栗者皆可以謀謨於廟堂之上若是則
反倫悖道甚矣何以異於是物哉是故經中言丹砂者
以類芙蓉而有光言當歸者以類馬尾蠶首言人參者
以人形黃芩以腐腸附子八角甘遂赤膚類不可悉數
若果土宜乃善則云生某所不當又云某者良也又經
註曰始興為上次乃廣連則不必服正為始興也今再

三為言者唯欲得其英精以固子敬之壽非以知藥石
角技能也若以服餌不必利己姑務勝人而夸辯博素
不望此於子敬其不然明矣故畢其說宗元再拜

唐荊川曰博喻文非不古然亦絕有蹊逕

與李睦州服氣書

文最工然篇末椎牛一段似漫潤子厚每每文
到縱橫時便露此態

二十六日宗元再拜前四五日與邑中可與遊者遊愚

溪上池西小丘坐柳下酒行甚歡坐者咸望兄不能俱以為兄由服氣以來貌加老而心少歡愉不若前去年時是時既言皆沮然炳昧思有以已兄用斯術而未得路間一日濮陽吳武陵最輕健先作書道天地日月黃帝等下及列仙方士皆死狀出千餘字頗甚快辯伏覩兄貌笑口順而神不偕來及食時竊睨和燥濕與啖飲多寡猶自若是兄陽德其言而陰黜其志也若古之强大諸侯然負固恃力敵至則諾去則肆是不可變之

尤者也攻之不得則宜濟師今吳子之師已遭諾而退矣愚敢厲銳擐堅鳴鍾鼓以進決於城下唯兄明聽之凡服氣之大不可者吳子已悉陳矣悉陳而不變者無他以服氣書多美言以為得恆久大利則又安得棄吾美言大利而從他人之苦言哉今愚甚呐不能多言大凡服氣之可不死歟不可歟壽歟夭歟康寧歟疾病歟若是者愚皆不言但以世之兩事已所經見者類之以明兄所信書必無可用愚幼時嘗嗜音見有學操琴者

不能得碩師而偶傳其譜讀其聲以布其爪指蚤起則
嚙嚙謔謔以逮夜又增以脂燭燭不足則諷而鼓諸席
如是十年以為極工出至大都邑操於衆人之座則皆
得大笑曰嘻何清濁之亂而疾舒之乖歟卒大慚而歸
及年少長則嗜書又見有學書者亦不能得碩師獨得
國故書伏而攻之其勤若向之為琴者而年又倍焉出
曰吾書之工能為若是知書者又大笑曰是形縱而理
逆卒為天下棄又大慚而歸是二者皆極工而反棄者

何哉無所師而徒狀其文也其所不可傳者卒不能得故雖窮日夜弊歲紀愈遠而不近也今兄之所以為服氣者果誰師耶始者獨見兄傳得氣書於盧遵所伏讀三兩日遂用之其次得氣訣於李計所又參取而大施行焉是書是訣遵與計皆不能知然則兄之所以學者無碩師矣是與向之兩事者無毫末差矣宋人有得遺契者密數其齒曰吾富可待矣兄之術或者其類是歟兄之不信今使號於天下曰孰為李睦州友者今欲已

睦州氣術者左袒不欲者右袒則凡兄之友皆左袒矣
則又號曰孰為李睦州客者今欲已睦州氣術者左袒
不欲者右袒則凡兄之客皆左袒矣則又以是號於兄
之宗族皆左袒矣號姻姪則左袒矣入而號之閨門之
內子姓親昵則子姓親昵皆左袒矣下之號於臧獲僕
妾則臧獲僕妾皆左袒矣出而號於素為將率胥吏者
則將率胥吏皆左袒矣則又之天下號曰孰為李睦州
讐者今欲已睦州氣術者左袒不欲者右袒則凡兄之

讐者皆右袒矣然則利害之源不可知也友者欲久存其道客者欲久存其利宗族姻姪欲久存其戚閨門之內子姓親昵欲久存其恩臧獲僕妾欲久存其主將率胥吏欲久存其勢讐欲速去其害兄之為是術凡今天下欲兄久存者皆懼而欲兄速去者獨喜兄為而不已則是背親而與讐夫背親而與讐不及中人者皆知其為大戾而兄安焉固小子之所懔懔也兄其有意乎卓然自更使讐者失望而慄親者得欲而忭則愚願椎肥

牛擊大豕剗羣羊以為兄餼窮隴西之麥殫江南之稻
以為兄壽鹽東海之水以為鹹醯敖倉之粟以為酸極
五味之適致五藏之安心恬而志逸貌美而身胖醉飽
謳歌愉懌訢歡流聲譽於無窮垂功烈而不刊不亦旨
哉孰與去味以即淡去樂以即愁悴悴焉膚日皺肌日
虛守無所師之術尊不可傳之書悲所愛而慶所憎徒
曰我能堅壁拒境以為強大是豈所謂強而大也哉無
任疑懼之甚謹再拜

答周君巢書

此子厚不好仙家者之言然大倨且君子以其
術延年却病未必無可取者

奉二月九日書所以撫教甚具無以加焉丈人用文雅
從知己日以惇大府之政甚適東西來者皆曰海上多
君子周為倡焉敢再拜稱賀宗元以罪大擯廢居小州
與囚徒為朋行則若帶縲索處則若闊桎梏彳亍而無
所趨拳拘而不能肆槁焉若朽墮焉若璞其形固若是

則其中者可得矣然由未嘗肯道鬼神等事今丈人乃
盛譽山澤之臞者以為壽且神其道若與堯舜孔子似
不相類焉何哉又曰餌藥可以久壽將分以見與固小
子之所不欲得也嘗以君子之道處焉則外愚而內益
智外訥而內益辯外柔而內益剛出焉則外內若一而
時動以取其宜當而生人之性得以安聖人之道得以
光獲是而中雖不至焉老其道壽矣今夫山澤之臞於
我無有焉視世之亂若理視人之害若利視道之悖若

義我壽而生彼夭而死固無能動其肺肝焉昧昧而趨
屯屯而居浩然若有餘掘草烹石以私其筋骨而日以
益愚他人莫利已獨以愉若是者愈千百年滋所謂夭
也又何以為高明之圖哉宗元始者講道不篤以蒙世
顯利動獲大僇用是奔竄禁錮為世之所詬病凡所設
施皆以為戾從而吠者成羣已不能明而况人乎然苟
守先聖之道由大中以出雖萬受擯棄不更乎其內大
都類往時京城西與丈人言者愚不能改亦欲丈人固

往時所執推而大之不為方士所惑仕雖未達無忘生人之患則聖人之道幸甚其必有陳矣不宣

與楊誨之疏解車義第二書

首尾二千言如一線然強合乎道者

張操來致足下四月十八日書始復去年十一月書言說車之說及親戚相知之道是二者吾於足下固具焉不疑又何逾歲時而乃克也徒親戚不過欲其勤讀書決科求仕不為大過如斯已矣告之而不更則憂憂則

思復之復之而又不更則悲悲則憐之何也戚也安有
以堯舜孔子所傳者而往責焉者哉徒相知則思責以
堯舜孔子所傳者就其道施於物斯已矣告之而不更
則疑疑則思復之復之而又不更則去之何也外也安
有以憂悲且憐之之志而強役焉者哉吾於足下固具
是二道雖百復之亦將不已况一二敢怠於言乎僕之
言車也以內可以守外可以行其道今子之說曰柔外
剛中子何取於車之疏耶果為車柔外剛中則未必不

為弊車果為人柔外剛中則未必不為恒人夫剛柔無常位皆宜存乎中有召焉者在外則出應之應之咸宜謂之中然後得名為君子必曰外恒柔則遭夾谷君子之臺及為蹇蹇匪躬以草君心之非莊以益乎人君子其不克歟中恒剛則當下氣怡色濟濟切切哀矜淑問之事君子其卒病歟吾以為剛柔同體應變若化然後能志乎道也今子之意近是也其號非也內可以守外可以行其道吾以為至矣而子不欲焉是吾所以惕

惕然憂且疑也今將申告予以古聖人之道書之言堯
曰允恭克讓言舜曰溫恭允塞禹聞善言則拜湯乃改
過不恠高宗曰啓乃心沃朕心惟此文王小心翼翼日
昃不暇食坐以待旦武王引天下誅紂而代之位其意
宜肆而曰予小子不敢荒寧周公踐天子之位捉髮吐
哺孔子曰言忠信行篤敬其弟子言曰夫子溫良恭儉
讓以得之今吾子曰自度不可能也然則自堯舜以下
與子果異類耶樂放弛而愁檢局雖聖人與子同聖人

能求諸中以厲乎已久則安樂之矣子則肆之所以異乎聖者在是決也若果以聖與我異類則自堯舜以下皆宜縱目印鼻四手八足鱗毛羽鬚飛走變化然後乃可苟不為是則亦人耳而子舉將外之耶若然者聖自聖賢自賢衆人自衆人咸任其意又何以作言語立道理千百年天下傳道之是皆無益於世獨遺好事者藻續文字以矜世取譽聖人不足重也故曰中人以上可以語上唯上智與下愚不移吾以子近上智今其言

曰自度不可能也則子果不能為中人以上耶吾之憂
且疑者以此凡儒者之所取大莫尚孔子孔子七十而
縱心彼其縱之也度不踰矩而後縱之今子年有幾自
度果能不踰矩乎而遽樂於縱也傳說曰唯狂克念作
聖今夫狙猴之處山叫呼跳梁其輕躁狠戾異甚然得
而繫之未半日則定坐求食唯人之為制其或侵人得
之加鞭箠狎而擾焉跪起趨走咸能為人所為者未有
一焉狂奔掣頓踣斃自絕故吾信夫狂之為聖也今子

有賢人之資反不肯為狂之克念者而曰我不能捨子其孰能乎是孟子之所謂不為也非不能也凡吾之致書為說車皆聖道也今子曰我不能為車之說但當則法聖道而內無愧乃可長久嗚呼吾車之說果不為聖道耶吾以內可以守外可以行其道告子今子曰我不能翦翦拘拘以同世取榮吾豈教子為翦翦拘拘者哉子何考吾說車之不詳也吾之所云者其道自堯舜禹湯高宗文王武王周公孔子皆由之而子不謂聖道抑

以吾為與世同波工為翦翦拘拘者以是教已固迷吾文而懸定吾意甚不然也聖人不以人廢言吾雖少時與世同波然未嘗翦翦拘拘也又子自言處衆中偏則擾攘欲棄去不敢猶勉強與之居苟能是何以不克為車之說耶忍汚雜器譁尚可恭其體貌遜其言辭何故不可吾之說吾未嘗為佞且偽其旨在於恭寬退讓以售聖人之道及乎人如斯而已矣堯舜之讓禹湯高宗之戒文王之小心武王之不敢荒寧周公之吐握孔子

之六十九未嘗縱心彼七八聖人者所為若是豈恒媿於心乎慢其貌肆其志茫洋而後言偃蹇而後行道人是非不顧齒類人皆心非之曰是禮不足者甚且見罵如是而心反不媿耶聖人之禮讓其且為偽乎為佞乎今子又以行險為車之罪夫車之為道豈樂行於險耶度不得已而至乎險期勿敗而已耳夫君子亦然不求險而利也故曰危邦不入亂邦不居國無道其默足以容不幸而及於危亂期勿禍而已耳且子以及物行道

為是耶非耶伊尹以生人為已任管仲爨浴以伯濟天下孔子仁之凡君子為道捨是宜無以為大者也今子書數千言皆未及此則學古道為古辭尤然而措於世其卒果何為乎是之不為而甘羅終軍以為慕棄大而錄小賤本而貴末夸世而釣奇苟求知於後世以聖人之道為不若二子僕以為過矣彼甘羅者左右反覆得利棄信使秦背燕之親已而反與趙合以致危於燕天下是以益知秦無禮不信視函谷闕若虎豹之窟羅之

徒實使然也子而慕之非夸世歟彼終軍者誕謫險薄
不能以道匡漢主好戰之志視天下之勞若觀蟻之移
穴覬而不戚人之死於胡越者赫然千里不能諫而又
聳踴之已則決起奮怒掉強越挾淫夫以媒老婦欲蠱
奪人之國智不能斷而俱死焉是無異盧狗之遇嗾呀
呀而走不顧險阻唯嗾者之從何無已之心也子而慕
之非釣奇歟二小子之道吾不欲吾子言之孔子曰是
聞也非達也使二小子及孔子氏曾不得與於琴張叔

皮狂者之列是固不宜以為的也且吾子之要於世者
處耶出耶主上以聖明進有道興大化枯槁伏匿縲綱
之士皆思踴躍洗沐期輔堯舜萬一有所不及丈人方
用德藝達於邦家爲大官以立於天下吾子雖欲為處
何可得也則固出而已矣將出於世而仕未二十而任
其心吾為子不取也馮婦好搏虎卒為善士周處狂橫
一旦改節皆老而自克今子素善士年又甚少血氣未
定而忽欲為阮咸嵇康之所為守而不化不肯入堯舜

之道此甚未可也吾意足下所以云云者惡佞之尤而不悅於恭耳觀過而知仁彌見吾子之方其中也其乏者獨外之圓耳屈子曰憲於羹者而吹鑿吾子其類是歟佞之惡而恭反得罪聖人所貴乎中者能時其時也苟不適其道則肆與佞同山雖高水雖下其為險而害也要之不異足下當取吾說車中而復之非為佞而利於險也明矣吾子惡乎佞而恭且不欲今吾又以圓告子則圓之為號固子之所宜甚惡方於恭也又將千百

焉然吾所謂圓者不如世之突梯苟冒以矜利乎已者也固若輪焉非特於可進也銳而不滯亦將於可退也安而不挫欲如循環之無窮不欲如轉丸之走下也乾健而運離麗而行夫豈不以圓克乎而惡之也吾年十七求進士四年乃得舉二十四求博學宏詞科二年乃得仕其間與恒人為羣輩數十百人當時志氣類足下時遭訕罵詬辱不為之面則為之背積八九年日思挫其形鋤其氣雖甚自折挫然已得號為狂躁人矣及為

藍田尉留府庭旦暮走謁於大官堂下與卒伍無別居
曹則俗吏滿前更說買賣商算贏縮又二年為此度不
能去益學老子和其光同其塵雖自以為得然已得號
為輕薄人矣及為御史郎官自以登朝廷利害益大愈
恐懼思欲不失色於人雖戒礪加切然卒不免為連累
廢逐猶以前時遭狂疎輕薄之號既聞於人為恭讓未
洽故罪至而無所明之到永州七年矣蚤夜遑遑追思
咎過往來甚熟講堯舜孔子之道亦熟益知出於世者

之難自任也今足下未為僕嚮所陳者宜乎欲任己之志此與僕少時何異然循吾嚮所陳者而由之然後知難耳今吾先盡陳者不欲足下如吾更訕辱被稱號已不信於世而後知慕中道費力而多害故勤勤焉云爾而已也子其詳之熟之無徒為煩言往復幸甚又所言書意有不可者令僕專專為掩匿覆蓋之慎勿與不知者道此又非也凡吾與子往復皆為言道道固公物非可私而有假令子之言非是則子當自求暴揚之使

人皆得刺列卒采其可者以正乎已然後道可顯達也今乃專欲覆蓋掩匿是固自任其志而不求益者之為也士傳言庶人謗於道子產之鄉校不毀獨何如哉君子之過如日月之蝕又何蓋乎是事吾不能奉子之教矣幸悉之足下所為書言文章極正其辭奧雅後來之馳於是道者吾子且為蒲稍駛驟何可當也其說韓愈處甚好其他但用莊子國語文字太多反累正氣果能遺是則大善矣憂閔廢錮悼籍田之罷意思懇懇誠愛

我厚者吾自度罪大敢以是為欣且戚耶但當把鋤荷
鍤決溪泉為圃以給茹其隙則浚溝池藝樹木行歌坐
釣望青天白雲以此為適亦足老死無戚戚者時時讀
書不忘聖人之道已不能用有我信者則以告之朝廷
更宰相來政事益修丈人日夕還北闕吾待子郭南亭
上期口言不久矣至是當盡吾說今因道人行粗道大
旨如此宗元白

唐宋八大家文鈔卷十八

欽定四庫全書

唐宋八大家文鈔卷十九

明 茅坤 撰

柳州文鈔三

書

與韓愈論史官書

子厚之文多雄辨而此篇尤其卓礪峭直處但太露氣岸不如昌黎渾涵文如貫珠

正月二十一日某頓首十八丈退之侍者前獲書言史事云具與劉秀才書及今乃見書藁私心甚不喜與退之往年言史事甚大謬若書中言退之不宜一日在館下安有探宰相意以為苟以史榮一韓退之耶若果爾退之豈宜虛受宰相榮已而冒居館下近密地食奉養役使掌故利紙筆為私書取以供子弟費古之志於道者不宜若是且退之以為紀錄者有刑禍避不肯就尤非也史以名為褒貶猶且恐懼不敢為設使退之為御

史中丞大夫其褒貶成敗人愈益顯其宜恐懼尤大也
則又將揚揚入臺府美食安坐行呼唱於朝廷而已耶
在御史猶爾設使退之為宰相生殺出入升黜天下士
其敵益衆則又將揚揚入政事堂美食安坐行呼唱於
內庭外衢而已耶何以異不為史而榮其號利其祿者
也又言不有人禍則有天刑若以罪夫前古之為史者
然亦甚惑凡居其位思直其道苟直雖死不可回也
如回之莫若亟去其位孔子之困於魯衛陳宋蔡齊楚

者其時暗諸侯不能以也其不遇而死不由作春秋故也當其時雖不作春秋孔子猶不遇而死也若周公史佚雖紀言書事猶遇且顯也又不得以春秋為孔子累范曄悖亂雖不為史其族亦赤司馬遷觸天子喜怒班固不檢下崔浩沽其直以鬪暴虜皆非中道左丘明以疾盲出於不幸子夏不為史亦盲不可以是為戒其餘皆不出此是退之宜守中道不忘其直無以他事自恐退之之恐唯在不直不得中道刑禍非所恐也凡言二

百年文武事多有誠如此者今退之曰我一人也何能明則同職者又所云若是後來繼今者又所云若是人皆曰我一人則卒誰能紀傳之耶如退之但以所聞知孜孜不敢怠同職者後來繼今者亦各以所聞知孜孜不敢怠則庶幾不墮使卒有明也不然徒信人口語每每異辭日以滋久則所云磊磊軒天地者決必不沉沒且亂雜無可考非有志者所忍恣也果有志豈當待人督責迫蹙然後為官守耶又凡鬼神事渺茫荒惑無

可準明者所不道退之之智而猶懼於此今學如退之辭如退之好言論如退之慷慨自為正直行行焉如退之猶所云若是則唐之史述其卒無可託乎明天子賢宰相得史才如此而又不果甚可痛哉退之宜更思可為速為果卒以為恐懼不敢則一日可引去又何以云行且謀也今當為而不為又誘館中他人及後生者此大惑已不勉已而欲勉人難矣哉

唐荆川曰提其原書辨處有顯有晦錯綜成文

與韓愈致段太尉逸事書

文自鏗鏘鼓舞

退之館下前者書進退之力史事奉答誠中吾病若疑不得
實未即籍者諸皆是也退之平生不以不信見遇竊自
寇好遊邊上問故老卒吏得段太尉事最詳今所趨走
州刺史崔公時賜言事又具得太尉實跡參校備具太
尉大節古固無有然人以為偶一奮遂名無窮今大不
然太尉自有難在軍中其處心未嘗虧側其莅事無一

不可紀會在下名未達以故不聞非直以一時取笏為
諒也史遷死退之復以史道在職宜不苟過日時昔與
退之期為史志甚壯今孤因廢錮連遭瘴鴟羸頓朝夕
就死無能為也第不能竟其業若太尉者宜使勿墜太
史遷言荆軻徵夏無且言大將軍徵蘇建言留侯徵畫
容貌今孤囚賤辱雖不及無且建等然比畫工傳容貌
尚差勝春秋傳所謂傳信傳著雖孔子亦猶是也竊自
以為信且著其逸事有狀

與劉禹錫論周易九六說書

確

見與董生論周易九六義取老而變以為卑中和承一行僧得此說異孔穎達疏而以為新奇彼畢子董子何膚末於學而遽云云也都不知一行僧承韓氏孔氏說而果以為新奇不亦可笑矣哉韓氏注乾之策二百一十有六曰乾一爻三十有六策則是取其過揲四分而九也坤之策一百四十有四曰坤一爻二十四策則是

取其過揲四分而六也孔穎達等作正義論云九六有二義其一者曰陽得兼陰陰不得兼陽其二者曰老陽數九老陰數六二者皆變用周易以變者占鄭玄注易亦稱以變者占故云九六也所以老陽九老陰六者九過揲得老陽六過揲得老陰此具在正義乾篇中周簡子之說亦若此而又詳備何異子董子之不視其書而妄以口承之也君子之學將有以異也必先究窮其書究窮而不得焉乃可以立而正也今二子尚未能讀韓

氏注孔氏正義是見其道聽途說者又何能知所謂易者哉足下取二家言觀之則見畢子董子膚末於學而遽云云也足下所為書非元凱兼三易者則諾若曰孰與穎達著則此說乃穎達說也非一行僧畢子董子能有異者也無乃即其謬而承之者歟觀足下出入筮數考校左氏今之世罕有如足下求易之悉者也然務先窮昔人書有不可者而後革之則大善謹之勿遽宗元

白

答元饒州論春秋書

辨

辱復書教以報張生書及答衢州書言春秋此誠世所希聞兄之學為不負孔氏矣往年曾記裴封叔定聞兄與裴太常言晉人及姜戎敗秦師于殽一義嘗諷習之又聞韓宣英及亡友呂和叔輩言他義知春秋之道久隱而近乃出焉京中於韓安平處始得微指和叔處始見集註恒願掃於陸先生之門及先生為給事中與宗

元入尚書同日居又與先生同巷始得執弟子禮未及
講討會先生病時聞要論嘗以易教誨見寵不幸先生
疾彌甚宗元又出邵州乃大垂謬不克卒業復於亡友
凌生處盡得宗指辨疑集註等一通伏而讀之於紀侯
大去其國見聖人之道與堯舜合不唯文王周公之志
獨取其法耳於夫人姜氏會齊侯于禚見聖人立孝經
之大端所以明其分也於楚人殺陳夏徵書丁亥楚子
入陳納公孫寧儀行父于陳見聖人褒貶予奪唯當之

所在所謂瑕瑜不掩也反覆甚喜若吾生前距此數十年則不得是學矣今適後之不為不遇也兄書中所陳皆孔氏大趣無得踰焉其言書荀息貶立卓之意也頃嘗怪荀息奉君之邪心以立嬖子不務正義棄重耳於外而專其寵孔子同於仇牧孔父為之辭今兄言貶息大善息固當貶也然則春秋與仇孔辭不異仇孔亦有貶歟宗元嘗著非國語六十餘篇其一篇為息發也今錄以往可如愚之所謂者乎微指中明鄭人來輸平量

力而退告而後絕固先同後異者也今檢此前無與鄭
同之文後無與鄭異之據獨疑此一義理甚精而事有
不合兄亦當指而教焉往年又聞和叔言兄論楚商臣
一義雖啖趙陸氏皆所未及請具錄當疏微指下以傳
末學蕭張前書亦請見及至之日勒為一卷以垂將來
宗元始至是州作陸先生墓表今以奉獻與宣英讀之
春秋之道如日月不可贊也若贊焉必同於孔跖優劣
之說故直舉其一二不宣

與友人論文書

古今號文章為難足下知其所以難乎非謂比興之不足恢拓之不遠鑽礪之不工頗穎之不除也得之為難知之愈難耳苟或得其高朗探其深贍雖有蕪敗則為日月之蝕也大圭之瑕也曷足傷其明黜其實哉且自孔氏以來茲道大闡家修人勵刊精竭慮者幾千年矣其間耗費簡札役用心神者其可數乎登文章之籙波及後代越不過數十人耳其餘誰不欲爭裂綺繡互攀

日月高視於萬物之中雄峙於百代之下乎率皆縱臾而不克躡躅而不進力感勢窮吞志而沒故曰得之為難嗟乎道之顯晦幸不幸繫焉談之辯訥升降繫焉鑒之頗正好惡繫焉交之廣狹屈伸繫焉則彼卓然自得以奮其間者合乎否乎是未可知也而又榮古虐今者比肩疊跡大底生則不過死而垂聲者衆焉揚雄沒而法言大興馬遷生而史記未振彼之二才且猶若是况乎未甚聞著者哉固有文不傳於後祀聲遂絕於天下

者矣故曰知之愈難而為文之士亦多漁獵前作戕賊
文史抉其意抽其華置齒牙間遇事蓬起金聲玉耀誑
聾聾之人徼一時之聲雖終淪棄而其奪朱亂雅為害
已甚是其所以難也間聞足下欲觀僕文章退發囊笥
編其蕪穢心悸氣動交於胸中未知孰勝故久滯而不
往也今往僕所著賦頌碑碣文記議論書序之文凡四
十八篇合為一通想令治書蒼頭吟諷之也擊轍拊缶
心有所擇顧鑒視何如耳還以一字示褒貶焉

答章中立論師道書

子厚諸書中佳處亦其生平所為文大指處

二十一日宗元白辱書云欲相師僕道不篤業甚淺近
環顧其中未見可師者雖嘗好言論為文章甚不自是
也不意吾子自京師來蠻夷間乃幸見取僕自卜固無
取假令有取亦不敢為人師為衆人師且不敢况敢為
吾子師乎孟子稱人之患在好為人師由魏晉氏以下
人益不事師今之世不聞有師有輒譁笑之以為狂人

獨韓愈奮不顧流俗犯笑侮收召後學作師說因抗顏而為師世果羣怪聚罵指目牽引而增與為言詞愈以是得狂名居長安炊不暇熟又挈挈而東如是者數矣屈子賦曰邑犬羣吠吠所怪也僕往聞庸蜀之南恒雨少日日出則犬吠予以為過言前六七年僕來南二年冬幸大雪踰嶺被南越中數州數州之犬皆蒼黃吠噬狂走者累日至無雪乃已然後始信前所聞者今韓愈既自以為蜀之日而吾子又欲使吾為越之雪不以病

乎非獨見病亦以病吾子然雪與日豈有過哉顧吠者
犬耳度今天下不吠者幾人而誰敢銜怪於羣目以召
閑取怒乎僕自謫過以來益少志慮居南中九年增脚
氣病漸不喜閑豈可使呶呶者早暮咷吾耳騷吾心則
固僵仆煩憤愈不可過矣平居望外遭齒舌不少獨欠
為人師耳抑又聞之古者重冠禮將以責成人之道是
聖人所尤用心者也數百年來人不復行近有孫昌胤
者獨發憤行之既成禮明日造朝至外廷薦笏言於卿

士曰某子冠畢應之者咸慚然京兆尹鄭叔則怫然曳
笏却立曰何預我耶廷中皆大笑天下不以非鄭尹而
怪孫子何哉獨為所不為也今之命師者大類此吾子
行厚而辭深凡所作皆恢恢然有古人形貌雖僕敢為
師亦何所增加也假而以僕年先吾子聞道著書之日
不後誠欲往來言所聞則僕固願悉陳中所得者吾子
苟自擇之取某事去某事則可矣若定是非以教吾子
僕材不足而又畏前所陳者其為不敢也決矣吾子前

所欲見吾文既悉以陳之非以耀明於子聊欲以觀子氣色誠好惡何如也今書來言者皆大過吾子誠非佞譽誣諛之徒直見愛甚故然耳始吾幼且少為文章以辭為工及長乃知文者以明道是固不苟為炳炳烺烺務采色夸聲音而以為能也凡吾所陳皆自謂近道而不知道之果近乎遠乎吾子好道而可吾文或者其於道不遠矣故吾每為文章未嘗敢以輕心掉之懼其剽而不留也未嘗敢以怠心易之懼其弛而不嚴也未嘗

敢以昏氣出之懼其昧沒而雜也未嘗敢以矜氣作之
懼其偃蹇而驕也抑之欲其奧揚之欲其明疎之欲其
通廉之欲其節激而發之欲其清固而存之欲其重此
吾所以羽翼夫道也本之書以求其質本之詩以求其
恒本之禮以求其宜本之春秋以求其斷本之易以求
其動此吾所以取道之原也參之穀梁氏以厲其氣參
之孟荀以暢其支參之莊老以肆其端參之國語以博
其趣參之離騷以致其幽參之太史以著其潔此吾所

以旁推交通而以為之文也凡若此者果是耶非耶有
取乎抑其無取乎吾子幸觀焉擇焉有餘以告焉苟亟
來以廣是道子不有得焉則我得矣又何以師云爾哉
取其實而去其名無招越蜀吠怪而為外庭所笑則幸
矣宗元復白

子厚中所論文章之旨未敢必其盡能如所云
要之亦本於饑心研神者而後之為文者特路
剽富者之金而以誇於天下曰吾且猗頓矣何

其不自量之甚也予故奮袂曰有志於文須本之六藝以求聖人之道其庶焉耳

答吳秀才謝示新文書

短牘亦自澹宕

某白向得秀才書及文章類前時所辱遠甚多賀多賀秀才志為文章又在族父處蚤夜孜孜何畏不日日新又日新也雖間不奉對苟文益日新則若亟見矣夫觀文章宜若懸衡然增之銖兩則俯反是則仰無可私者

秀才誠欲令吾俯乎則莫若增重其文今觀秀才所增
益者不啻銖兩吾固伏膺而俯矣愈重則吾俯滋甚秀
才其懋焉苟增而已則吾首懼至地耳又何間疎之
患乎還答不悉

復杜溫夫書

書旨似倨而語亦多光駁

二十五日宗元白兩月來三辱生書書皆逾千言意者
相望僕以不對答引譽者然僕誠過也而生與吾文又

十卷噫亦多矣文多而書頻吾不對答而引譽宜可自
反而來徵不肯相見亟拜亟問其得終無辭乎凡生十
卷之文吾已略觀之矣吾性駛滯多所去甚諭安敢懸
斷是且非耶書抵吾必曰周孔周孔安可當也語人必於其
倫生以直躬見抵宜無所諛道而不幸乃曰周孔吾豈
得無駭怪且疑生悖亂浮誕無所取幅尺以故愈不對
答來柳州見一刺史即周孔之今而去我道遠而謁於
潮之二邦又得二周孔去之京師京師顯人為文詞立

聲名以千數又宜得周孔千百何吾生胸中擾擾馬多
周孔哉吾雖少為文不能自雕斲引筆行墨快意累累
意盡便止亦何所師法立言狀物未嘗求過人亦不能
明辨生之才致但見生用助字不當律令唯以此奉答
所謂乎歟耶哉夫者疑辭也矣耳焉也者決辭也今生
則一之宜考前聞人所使用與吾言類且異慎思之則
一益也庚桑子言瞿燭鵠卵者吾取焉道速而謁於潮
其卒可化乎然世之求知音者一遇其人或為十數文

即務往京師急日月犯風雨走謁門戶以冀苟得今生
年非甚少而自荆來柳自柳將道連而謁於潮途遠而
深矣則其志果有異乎又狀貌嶷然類丈夫視端形直
心無歧逕其實氣誠可也獨要謹充之爾謹充之則非
吾獨能生勿怨亟之二邪以取法時思吾言非固拒生
者孟子曰余不屑之教誨也者是亦教誨而已矣宗元
白

答貢士廖有方論文書

中多自矜亦自悲愴

三日宗元白得秀才書知欲僕為序然吾為文非苟
然易也於秀才則吾不敢愛吾在京都時好以文寵
後輩由吾文知名者亦為不少焉自遭斥逐禁錮益
為輕薄小兒譁囂羣朋增飾無狀當途人率謂僕垢
汚重厚舉將去而遠之今不自料而序秀才秀才無
乃未得嚮時之益而受後事之累吾是以懼潔然盛
服而與負塗者處而又何賴焉然觀秀才勤懇意

甚久遠不為頃刻私利欲以就文雅則吾曷敢以讓當為秀才言之然而無顯出於今之世視不為流俗所扇動者乃以示之既無以累秀才亦不增僕之詬罵也許無宜於此若果能是則吾之荒言出矣宗元白

答韋珩示韓愈相推以文墨事書

歐陽公書似柳子厚此書者為多

足下所封示退之書云欲推避僕以文墨事且以勵足

下若退之之才過僕數人尚不宜推避於僕非其實可知固相假借為之詞耳退之所敬者司馬遷揚雄遷於退之固相上下若雄者如太玄法言及四愁賦退之獨未作耳決作之加恢奇至他文過揚雄遠甚雄文遺言措意頗短局滯澁不若退之猖狂恣睢肆意有所作若然者使雄來尚不宜推避而况僕耶彼好獎人善以為不屈己善不可獎故慊慊云爾也足下幸勿信之且足下志氣高好讀南北史書通國朝事穿穴古今後來無

能和而僕稚駿卒無所為但超超文墨筆硯淺事今退之不以吾子勵僕而反以僕勵吾子愈非所宜然卒篇欲足下自挫抑合當世事以固當雖僕亦知無出此吾子年甚少知己者如麻不患不顯患道不立耳此僕以自勵亦以佐退之勵足下不宣

答貢士沈起書

風神盎然特篇末猶似未了語

蒼頭至得所來問志氣盈牘博我以風賦比興之旨僕

之樸駿專魯而當惠施鍾期之位深自恧也又覽所著
文宏博中正富我以琳琅珪璧之寶甚厚僕之狹陋蚩
鄙而膺東阿昭明之任又自懼也烏可取識者歡笑以
為知己羞進越高視僕所不敢然特枉將命猥承厚贊
豈得固拒雅志默默而已哉謹以所示布露於聞人羅
列乎坐隅使識者動目聞者傾耳幾于萬一用以為報
也嗟乎僕嘗病興寄之作堙鬱于世辭有枝葉蕩而成
風益用慨然間歲興化里蕭氏之廬覩足下詠懷五篇

僕乃拊掌愜心吟玩為娛告之能者誠亦響應今乃有五十篇之贈其數相什其功相百覽者歎息謂余知文此又足下之賜也幸甚幸甚勉懋厥志以取榮盛時若夫古今相變之道質文相生之本高下豐約之所自長短大小之所出于之言云又何訊焉來使告遽不獲申盡輒奉草具以備還答

報袁君陳秀才避師名書

蒼蔚可誦

秀才足下僕避師名久矣往在京師後學之士到僕門
日或數十人僕不敢虛其來意有長必出之有不至必
恭之其教也雖若是當時無師弟子之說其所不樂為
者非以師為非弟子為罪也有兩事故不能自視以為
不足為一也世久無師弟子決為之且見非且見罪懼
而不為二也其大說具答韋中立書今以往可觀之秀
才貌甚堅辭甚強僕自始覩固竒秀才及見兩文愈益
竒雖在京都日數十人到門者誰出秀才右耶前已必

秀才可為成人僕之心固虛矣又何鯤鵬互鄉於尺牘哉秋風益高暑氣益衰可偶居卒談秀才時見咨僕有諸內者不敢愛惜大抵文以行為本在先誠其中其外者當先讀六經次論語孟軻書皆經言左氏國語莊周屈原之辭稍采取之穀梁子太史公甚峻潔可以出入餘書俟文成異日討也其歸在不出孔子此其古人賢士所懷懷者求孔子之道不於典書秀才志於道慎勿怪勿雜勿務速顯道苟成則勃然爾久則蔚然爾源而

流者歲旱不涸蓄穀者不病凶年蓄珠玉者不虞殍死矣然則成而久者其術可見雖孔子在為秀才計未必過此不具宗元白


答嚴厚輿論師道書

二十五日某白馮翊嚴生足下得生書言為師之說怪僕所作師友箴與答韋中立書欲變僕不為師之志而屈己為弟子凡僕所為二文其卒果不異僕之所避者名也所憂者其實也實不可一日忘僕聊歌以為箴行

且求中以益己慄慄不敢暇又不敢自謂有可師乎人者耳若乃名者方為薄世笑罵僕脆怯尤不足當也內不足為外不足當衆口雖懇懇見迫其若吾子何實之要二文中皆是也吾子其詳讀之僕見解不出此吾子所云仲尼之說豈易耶仲尼可學不可為也學之至斯則仲尼矣未至而欲行仲尼之事若宋襄公好霸而敗國卒中矢而死仲尼豈易言耶馬融鄭玄者二子獨章句師耳今世固不少章句師僕幸非其人吾子欲之其

有樂而望吾子者矣言道講古窮文辭以為師則固吾屬事僕才能勇敢不如韓退之故又不為人師人之所見有異同吾子無以韓責我若曰僕拒千百人又非也僕之所拒拒為師弟子名而不取當其禮者也若言道講古窮文辭有來問我者吾豈嘗瞑目閉口邪敬叔吾所信愛今不得見其人又不敢廢其言吾子文甚暢遠恢恢乎其闢大路將疾馳也攻其車肥其馬長其筭調其六轡中道之行大都捨是又奚師歟亟謀於知道者

而考諸古師不乏矣幸而亟來終日與吾子言不敢倦
不敢愛不敢肆苟去其名全其實以其餘易其不足亦
可交以為師矣如此無世俗累而有益乎已古今未有
好道而避是者宗元白



唐宋八大家文鈔卷十九

欽定四庫全書

集部

唐宋八大家文鈔卷三

欽定四庫全書

集部

唐宋八大家文鈔卷三

詳校官左中允臣允塘五珠

侍讀臣孫球覆勘

總校官檢討臣何思鈞

校對官庶吉臣潘庭筠

謄錄監生臣周元梓

欽定四庫全書

唐宋八大家文鈔卷二十

明 茅坤 撰

柳州文鈔四

書跋

止李夷簡相公書

日月使持節柳州諸軍事守柳州刺史柳宗元謹獻書

于相公閣下宗元聞有行三塗之艱而墜千仞之下者

仰望於道號以求出過之者日千百人皆去而不顧就令哀而顧之者不過攀木俯首深矚太息良久而去耳其卒無可奈何然其人猶望而不止也俄而有若烏獲者持長綆千尋徐而過焉其力足為也其器足施也號之而不顧顧而曰不能力則其人知必死於大壑矣何也是時不可遇而幸遇焉而又不逮乎已然後知命之窮勢之極其卒呼憤自斃不復望於上矣宗元曩者齒少心銳徑行高步不知道之難以陷乎大阨窮躉殞墜

廢為孤囚日號而望者十四年矣其不顧而去與顧而
深贖者俱不之焉然猶仰首伸吭張目而視曰庶幾乎
其有異俗之心非常之力當路而垂仁者耶今閣下以
仁義正直入居相位宗元實竊拊心自慶以為獲其所
望故敢致其詞以聲其哀若又捨而不顧則知沈理陪
斃無復振矣伏惟動心焉宗元得罪之由致謗之自以
閣下之明其知之久矣繁言蔓詞抵益為贖伏惟念墜
者之至窮錫烏獲之餘力舒千尋之綆垂千仞之難致

其不可遇之遇以卒成其幸庶號而望者得畢其誠無使呼憤自斃沒有餘恨則士之死於門下者宜無先焉生之通塞決在此舉無任戰汗隕越之至

子厚困阨之久故其書呼號哀籲若此錄而存之以見其始末云

答元饒州論政理書

纖悉

奉書辱示以政理之說及劉夢得書往復甚善類非今

之長人者之志不惟充賦稅養祿秩足而已獨以庶
富且教為大任甚盛甚盛孔子曰吾與回言終日不違
如愚然則蒙者固難曉必勞申諭乃得悅服用是尚有
一疑焉兄所言免貧病者而不益富者稅此誠當也乘
理政之後固非若此不可不幸乘弊政之後其可爾耶
夫弊政之大莫若賄賂行而征賦亂苟然則貧者無貲
以求於吏所謂有貧之實而不得貧之名富者操其贏
以市於吏則無富之名而有富之實貧者愈困餓死亡

而莫之省富者愈恣橫侈泰而無所忌兄若所遇如是則將信其故乎是不可懼撓人而終不問也固必問其實問其實則貧者固免而富者固增賦矣安得持一定之論哉若曰止免貧者而富者不問則僥倖者衆皆挾重利以邀貧者猶若不免焉若曰檢富者懼不得實而不可增焉則貧者亦不得實不可免矣若皆得實而故縱以為不均何哉孔子曰不患寡而患不均不患貧而患不安今富者稅益少貧者不免於捐拾以輸縣官其

為不均大矣非唯此而已必將服役而奴使之多與之
田而取其半或乃取其一而收其二三主上思人之勞
苦或減除其稅則富者以戶獨免而貧者以受役卒輸
其二三與半焉是澤不下流而人無所告訴其為不安
亦大矣夫如是不一定經界覈名實而姑重改作其可
理矣乎富室貧之母也誠不可破壞然使其大倅而後
於下則又不可兄云懼富人流為工商浮窳蓋甚急而
不均則有此耳若富者雖益賦而其實輸當其十一猶

足安其堵雖驅之不肯易也檢之逾精則下逾巧誠如兄之言管子亦不欲以民產為征故有殺畜伐木之說今若非市井之征則捨其產而唯丁田之間推以誠質示以恩惠嚴責吏以法如所陳一社一村之制述以信相考安有不得其實不得其實則一社一村之制亦不可行矣是故乘弊政必須一定制而後兄之說乃得行焉蒙之所見及此而已永州以僻隅少知人事元之所代者誰耶理歟弊歟理則其說行矣若其弊也蒙之說

具在可用之數乎因南人來重晚之其他皆善愚不足
以議願同夢得之云者兄通春秋取聖人大中之法以
為理饒之理小也不足費其慮無所論刺故獨舉均賦
之事以求往復而除其惑焉不習吏職而強言之宜為
長者所笑弄然不如是則無以來至當之言蓋明而教
之君子所以開後學也又聞兄之莅政三日舉韓宣英
以代已宣英達識多聞而習於事宜當賢者類舉今負
罪屏棄凡人不敢稱道具善又況聞於大君以二千石

薦之哉是乃希世拔俗果於直道斯古人之所難而凡行之宗元與宣英同罪皆世所背馳者也凡一舉而德皆及焉祁大夫不見叔向今而預知斯舉下走之大過矣書雖多言不足導意故止於此不宣

與呂恭書

中亦有佳處荆川云學左氏外傳

宗元白元生至得弟書甚善諸所稱道具之元生又持部中廬墓父者所得石書模其文示余云若將聞於上

余故恐而疑焉僕蚤好觀古書家所蓄晉魏時尺牘甚
具又二十年來徧觀長安貴人好事者所蓄殆無遺焉
以是善知書雖未嘗見名氏亦望而識其時也又文章之
形狀古今特異弟之精敏通達夫豈不究於此今視石
文署其年曰永嘉其書則今田野人所作也雖支離其
字尤不能近古為其永字等頗效王氏變法皆永嘉所
未有辭尤鄙近若今所謂律詩者晉時蓋未嘗為此聲
大謬妄矣又言植松烏櫂之怪而掘其土得石尤不經

難信或者得無姦為之乎且古之言墓者藏也壞樹之而君子以為議况廬而居者其足尚之哉聖人有制度有法令過則為辟故立大中者不尚異教人者欲其誠是故惡夫飾且偽也過制而不除喪宜廬於庭而矯於墓者大中之罪人也况又出怪物詭神道以奸大法而因以為利乎夫偽孝以奸利誠仁者不忍樞過恐傷於教也然使偽可為而利可冒則教益壞若然者勿與知焉可也伏而不出之可也以大夫之政良而吾子贊焉

固無闕遺矣作東郭改市鄽去比竹茨草之室而埴土
大木陶甄梓匠之工備孽火不得作化惰窳之俗絕偷
浮之源而條桑浴種深耕易耨之力用寬徭嗇貨均賦
之政起其道美矣於斯也慮善善之過而莫之省誠慤
之道少損故敢私言之夫以淮濟之清有玷焉若秋豪
固不為病然而萬一離妻子眇然睨之不若無者之快
也想默已其事無出所置書幸甚宗元白

賀進士王參元失火書

深識之言逼古之文

得楊八書知足下遇火災家無餘儲僕始聞而駭中而
疑終乃大喜蓋將吊而更以賀也道遠言略猶未能究
知其狀若果蕩焉泯焉而患無有乃吾所以尤賀者也
足下勤奉養樂朝夕惟恬安無事是望也今乃有焚燬
赫烈之虞以震駭左右而脂膏涓滴之具或以不給吾
是以始而駭也凡人之言皆曰盈虛倚伏去來之不可
常或將大有為也乃始厄困震悖於是水火之孽有

羣小之慍勞苦變動而後能光明古之人皆然斯道遠
闊誕漫雖聖人不能以是必信是故中而疑也以足下
讀古人書為文章善小學具為多能若是而進不能出
羣士之上以取顯貴者蓋無他焉京城人多言足下家
有積貨士之好廉名者皆畏忌不敢道足下之善獨自
得之心蓄之銜忍而不岀諸口以公道之難明而世之
多嫌也一出口則嗤嗤者以為得重賂僕自貞元十五
年見足下之文章蓄之者蓋六七年未嘗言是僕私一

身而負公道久矣非特負足下也及為御史尚書郎自以幸為天子近臣得奮其舌思以發明足下之鬱塞然時稱道於行列猶有顧視而竊笑者僕良恨修己之不亮素譽之不立而為世嫌之所加常與孟幾道言而痛之乃令幸為天火之所溫滌凡衆之疑慮舉為灰埃黜其廬褚其垣以示其無有而足下之才能乃可以顯白而不汚其實出矣是祝融回祿之相吾子也則僕與幾道十年之相知不若茲火一夕之為足下譽也宥而彰

之使夫蓄於心者咸得開其喙發策決科者授子而不
慄雖欲如嚮之蓄縮受侮其可得乎於茲吾有希望於子
是以終乃大喜也古者列國有災同位者皆相吊許不
吊災君子惡之今吾之所陳若是有以異乎古故將吊
而更以賀也顏曾之養其為樂也大矣又何鬪焉足下
前要僕文章古書極不忘候得數十幅乃併往耳吳二
十一武陵來言足下為醉賦及對問大善可寄一本僕
近亦好作文與在京城時頗異思與足下輩言之桎梏

甚固未可得也因人南來致書訪死生不患宗元白

上西川武元衡相公謝撫問啟

子厚諸啓非為四六而已中多奇峭沉鬱之旨
予不能盡錄錄凡四首

某啟某愚陋狂簡不知周防失於夷途陷在大罪伏匿
嶺下于今七年追念往愆寒心飛魄幸蒙在宥得自循
省豈敢徹聞于廊廟之上見志於樽俎之際以求心於
萬一者哉相公以含弘光大之德廣博淵泉之量不遺

玷污先賜榮示奉讀流涕以懼以悲屏營舞躍不敢寧
處是將收益明於三敗責曹沫於一舉俾折脣臚脚之
倫得自拂飾以期效命於鞭策之下此誠大君子并容
廣覽棄瑕錄用之道也自顧屏鈍無以克堪祇受大賜
豈任負戴精誠之至炳然如日拜伏無路不勝惶惕輕
冒威重戰汗交深

賀趙江陵宗儒辟符載啟

某啟伏聞以武都符載為記室天下立志之士雖然相

顧繼以歎息知為善者得其歸嚮流言者有所間執直
道之所行義風之所揚堂堂焉實在荆山之南矣幸甚
幸甚夫以苻君之藝術志氣為時聞人才位未會盤桓
固久中間因緣陷在危邦與時偃仰不廢其道而為見
忌嫉者橫致唇吻房給事以高節特立聞之於朝王吏
部以清議自任辨之於外然猶小人浮議因在交戰凡
諸侯之欲得苻君者城聯壤接而惑於騰沸環視相讓
莫敢先舉及受署之日則皆開口垂臂悵望悼悔譬之

求珠於海而徑寸先得則衆皆快然罷去知奇寶之有所歸也嗚呼巧言難明下流多謗自非大君子出世之氣則何望焉瞻望清風若在天外無任感激欣躍之至輕瀆陳賀不勝戰越不宣

上襄陽李僕射懇獻唐雅詩啟

佳什

宗元啟昔周宣中興得賢臣召虎師出江漢以平淮夷故其詩曰江漢之滌王命召虎其卒章曰于周受命自

召祖命以明虎者召公之孫克承其先也今天子中興
而得閣下亦出江漢以平淮夷克承于先西平王其事
正類然而未有嗣大雅之說以布天下以施後代豈聖
唐之文雅獨後於周室哉宗元身雖陷敗而其論著往
往不為世屈意者殆不可自薄自匿以墜斯時苟有輔
萬分之一雖死無憾謹撰平淮夷雅二篇齋沐上獻誠
醜言淫聲不足以當金石庶繼代洪烈裨官里人得採
而歌之不勝憤踊之至輕瀆威重戰越文深謹啟

上權德輿補闕溫卷啟

補闕執事宗元聞之重遠輕邇賤視貴顯所由古矣切以宗元幼不知恥少又躁進拜揖長者自于幼年是以造後造之末跡廁牒計之下列賈藝求售聞無善價載文筆而都儒林者匪親乃舊率皆攜撫相示談笑見昵嗟乎逡巡為達者嗤無乃覩其模者鄙其成狎其幼者薄其長耶將行不拔異操不砥礪學不該廣文不炳耀實可鄙而薄耶今駕鷺充朝而獨于執事者特以顧下

念舊收接儒素異乎他人耳敢問厥由庶幾告之俾識去就幸甚幸甚今將慷慨激昂奮攘布衣縱談作者之筵曳裾名卿之門抵掌峩弁厚自潤澤進越無恧汎達者之視聽狂狷愚妄固不可為也復欲俛默惕息疊足搃翼拜祈公侯之間跪邀賢達之車竦魂慄股兢恪危懼榮者倦之彌忿厥心又不可為也若慎守其常確執厥中固其所矣則又色平氣柔言訥性魯無特達之節無推擇之行瑣瑣碌碌一孺子耳孰謂其可進孰謂其

可退抑又聞之不鼓踴無以超泥塗不曲促無以由險
艱不守常無以處明分不執中無以超夷軌今則鼓踴
乎曲促乎守其常而執厥中乎浩不知其宜矣進退無
倚宵不遑寐乃訪于故人而咨度之其人曰補闕權君
著名踰紀行為人高言為人信力學挾文時儕稱雄子亟
拜之足以發揚對曰衷燕石而履玄圃帶魚目而游漲
海祇取誚耳曷予補乎其人曰跡之勤者情必生焉心
之恭者禮必報焉况子之文不甚鄙薄者乎苟或勤以

奉之恭以下之則必勗厲爾行憚懼爾能言為建瓴晨
發夕被聲馳而響溢風振而草靡可使尺澤之鯢奮鱗
而縱海密網之鳥舉羽而翔霄子之一名何足就矣庶
為終身之遇乎曷不舉馳聲之資挈成名之基授之權
君然後退行守常執中之道斯可也愚不敢以為信然
是以有前日之拜又以為色取象恭大賢所厭朝造夕
謁大賢所倦性頗疎野竊又不能是以有今茲之間仰
惟覽其鄙心而去就之潔誠齋慮不勝至願謹再拜

上大理崔大卿應制舉啟

古之知已者不待來求而後施德舉能而已其受德者
不待成身而後拜賜感知而已故不叩而響不介而合
則其舉必至而其感亦甚斯道迺去遠閭千祀何為乎
今之世哉若宗元者智不能經大務斷大事非有恢傑
之才學不能探奧義窮章句為腐爛之儒雖或寘力於
文章勤勤懇懇于歲時然而未能極聖人之規矩恢作
者之聞見勞費翰墨徒爾施達復曳大帶游於朋黨且

有愧色豈有能乎哉閣下何見待之厚也始者自謂抱
無用之文戴不肖之容雖振身泥塵仰睇雲霄何由而
能哉遂用收視內顧頰首絕望甘以沒沒也今者果不
自意他日琰琰之著述幸得流於衽席接在視聽閣下
乃謂可以蹈遠大之途及制作之門決而不疑介然
而獨德是何收採之特達而顧念之勤備乎且閣下知
其為人何如哉其貌之美陋質之細大心之賢不肖閣
下固未知也而一遇文字志在濟拔斯蓋古之知已者

已故曰古之知已者不待來求而後施德者也然則亟
來而求者誠下科也宗元向以應博學宏詞之舉會閱
下辱臨考第司其升降當此之時意謂運合事并適丁
厥時其私心日以自負也無何閣下以鯢鱗之勢不容
尺澤悠爾而自放廓然而高邁其不我知者遂排逐而
委之委之誠當也使古之知已猶在豈若是求多乎哉
夫仕進之路昔者竊聞于師矣太上有專達之能乘時
得君不由乎表著之列而取將相行其政焉其次有文

行之美積能累勞不由乎舉甲乙歷科第登乎表著之
列顯其名焉又其次則曰吾未嘗舉甲乙也未嘗歷科
第也彼朝廷之位吾何修而可以登之乎必求舉是科
也然後得而登之其下不能知其利又不能務其往則
曰舉天下而好之吾何為獨不然由是觀之有愛錐刀
者以舉是科為悅者也有爭尋常者以登乎朝廷為悅
者也有慕權貴之位者以將相為悅者也有樂行其政
者以理天下為悅者也然則舉甲乙歷科第固為末而

已矣得之不加榮喪之不加憂苟成其名於遠大者何
補焉然而至於感知之道則細大一矣成敗亦一矣故
曰其受德者不待成身而後拜賜然則幸成其身者固
末節也蓋不知來求之下者不足以收特達之士而不
知成身之末者不足以承賢達之遇審矣伏以閭下德
足以儀世才足以輔聖文足以當宗師之位學足以冠
儒述之首誠為賢達之表也顧視下輩豈容易而收哉
而宗元樸野昧劣進不知退不可以言乎德不能植志

於義而必以文字求達不可以言乎才秉翰執簡敗北而歸不可以言乎文登場應對刺繆經旨不可以言乎學固非特達之器也忖省陋質豈容易而承之哉叨冒大遇穢累高鑒喜懼交爭不克寧居竊感荀鑑如實出己之德敢希豫讓國士遇我之報伏候門屏敢俟招納謹奉啟以代投刺之禮伏惟以知己之道終撫薦焉不宣宗元謹啟

唐宋八大家文鈔卷二十